

Ekwo Hagayi Onye Mpuchiru Chileke

Oku k'akpukwa eze-ulo Chipfu

¹ Opfu Chipfu rwuru onye mpuchiru ono, bu Hagayi nchi l'apha, kwe onye eze ono, bu Dariyosu ebo l'abu eze iya; le mboku mbu l'ime onwa k'ishii ya. O je epfuaru iya Zerubabelu nwa Sheyalutiyele; onye bu iya bu nnajioha le Jiuda teke ono. O pfukwaaru iya pho Jioshuwa nwa Jiehozadaku onye bu iya bu onye-ishi ndu-uke Chileke. O su phe: ² "Wakwa iphe, oopfu baa; mbu Chipfu, bu Okalibe-Kakota-Ike: Ndu-a l'anoduje epfu su l'o toko rwudu teke aa-kpukwa eze-ulo ke Chipfu." ³ Tobudu iya bu; Chipfu gbenu l'eka onye mpuchiru ono, bu Hagayi zia ozi su: ⁴ "Bu nta-a be o gbaru g'unubedua l'onwunu e-bugbaaru l'ulo unu, a kpuru mee ya ona; ulo-a buru okorobo ulo g'o bu-a?" ⁵ Mbu-a; wakwa iphe, oopfu baa; mbu Chipfu, bu Okalibe-Kakota-Ike: Unu leanaro enya huma g'uzo unu gbaru! ⁶ G'unu koru iphe, ha shii l'ali; unu kpata iya iphe, abadu ishi. Unu nodu erije nri; o too jidu unu epho; unu angwa iphe, aangwu angungu; unu taa ngu-jidu epho. Unu nodu eyeje uwe; o too kposhidu g'oyi ta anodu atsụ unu. Ndu aapfu ugwo nodu anataje ugwo phe chiru ye l'ekpa, fuhuru uzo. ⁷ Wakwa iphe, oopfu baa;

mbụ Chipfu, bụ Okalibe-Kakọta-Ike: Unu lenaa ẹnnya hụma g'uzo unu gbaru! ⁸ Unu gbeshi je l'úbvú úbvú je ekwoshia oshi bya egude mee ụlo-a; k'ophu oo-me g'ẹhu tsoo mu uto; teme l'a nọdukwa iya pho kwabe mu ubvu. O kwa Chipfu epfu.

⁹ “G'unu leri ẹnnya iphe, ha shii; abya l'ele ẹnnya; o buru iphe, abadu ishi. Iphe, unu wolataru unuphu be mu aphuje swaa phukashia. ?Bụ gụnu kparụ iya? O kwa Chipfu epfu. O kwa ụlo mu ono, unu parụ haa; o buru okorobo ụlo ono kparụ iya; l'eka unubedua l'ẹhu l'ẹhu esegbaa akanya ụlo k'unu. ¹⁰ Oo ya bụ le-a; o kwa unu meru g'o gude igwe kwabuhu iji; alị mehubuhu iphe, e meberu iya. ¹¹ Noo ya; mu kua okpomoku oku; o bya l'egu bya ekpoahaa l'eli úbvú úbvú; bya abaa l'ereshi; mekpoo le vayinu; mekpoo oshi olivu; mekpoo iphe, bukpoo iphe, eemetajekpoo l'alị; kpoahaa nemadzụ; mekpoo iphe-edobe; mekpoo l'akanya, unu gude eka unu see.”

¹² Tọbudu iya bụ; Zerúbabelu nwa Sheyalutiyelu; yee Jioshuwa nwa Jiehozadaku, onye bụ iya bụ onye-ishi ndu-uke Chileke; me iphe, bukpoo nwa ndu ono, wafuru nụ ono g'ephe ha bya emee olu Chipfu, bụ Chileke phe; mbụ ozi, onye mpfuchiru ono, bụ Hagayi ziru phe; kele o Chipfu, bụ Chileke phe yeru iya g'o bya. Ndu ono tsuhaa Chipfu ebvu. ¹³ O buru iya bụ; Hagayi ono, bụ onye-ozi Chipfu ono bya ezia ndu ono ozi-a, bụ ozi, Chipfu ziru iya ono: “Mu nọkwa swiru unu eswiru. O kwa Chipfu epfu.” ¹⁴ O buru iya bụ le Chipfu eshi nno kpalia obu Zerúbabelu

nwa Sheyalutiyelu; onye bu iya bu nnajioha le Jiuda; kpalia obu Jioshuwa nwa Jiehozadaku; onye bu iya bu onye-ishi ndu-uke Chileke; bya akpalia obu iphe, bu ndu Izurelu g'ephe ha, bu nwa ndu ono, wafuru nu ono. Ephe bya awata eje ozi l'eze-ulo Chipfu ono, bu Okalibe-Kakota-Ike ono; mbu Chileke phe ono, ¹⁵ le g'onwa k'ishii ono du l'ukporo abali l'abali eno l'apha k'ebo, onye eze ono, bu Dariyosu nowaru l'okwa eze iya.

2

Epfu g'ulo ophuu ono a-maberu mma

¹ O rwua le g'onwa k'esaa du le ukporo abali l'abali lanu; Opfu Chipfu rwua onye mp-fuchiru, bu Hagayi nchi su: ² "Waa iphe, ii-zi Zerubabelu nwa Sheyalutiyelu, onye bu iya bu nnajioha le Jiuda; zikwa ya pho Jioshuwa nwa Jiehozadaku, onye bu iya bu onye-ishi ndu-uke Chileke; mekpoo iphe, bu ndu Izurelu, g'ephe ha, bu nwa ndu ono, wafuru nu ono. Jia phe su phe-a: ³ G'unu hakpoo-a; ?bu ndu ole phodukwaduru, bu ndu humaru ulo-a g'o shi du-be ubvu le mbu? ?Denu g'o du unu nta? ? To dudu unu g'iphe, eeme ke mmanu? ⁴ Obenu nta; shihukwa obu ike gube Zerubabelu. O kwa Chipfu epfu. Shihukwa obu ike gube Jioshuwa nwa Jiehozadaku, onye bu ngu bu onye-ishi ndu-uke Chileke; unu noshikota ike; iphe, bu unube ndu ali-a l'ophu. O kwa Chipfu epfu. Unu je ozi, unu eje; kele mu no swiru unu

eswiru. Nokwa iphe, Chipfu, bu Ọkalibe-Kakọta-Ike eepfu. ⁵ Ọwaa bukwa oğbandzu, mu l'unu gbaru teke unu shi le Ijiputu wufuta; mbu le Unme mu nokwa l'echilabọ unu. Ọo ya bu ge ndzu ba agukwa unu!”

⁶ “Wakwa iphe, Chipfu, bu Ọkalibe-Kakọta-Ike eepfu: Ọ to dukwa g'oo-no-beru; mu anmaa igwe l'ophu yigayiga; nmaa eliphe l'ophu yigayiga; yee eze-enyimu; yee ali, kpohuru nku.

⁷ Mu a-nma ohamoha l'ophu yigayiga. Onye ono, ohamoha ele enya iya ono abya. Mu emee g'akpabiri iya ji ulo-a l'ophu. Ọ kwa iphe, Chipfu, bu Ọkalibe-Kakọta-Ike eepfu. ⁸ Mkpola-ochaa bu nkemu; mkpola-ododo buru nkemu. Ọ kwa Chipfu, bu Ọkalibe-Kakọta-Ike eepfu. ⁹ Akpabiri k'ulo ikpazu-a a-kakwa shii eme l'akpabiri iya k'akahu iya. Ọ kwa Chipfu, bu Ọkalibe-Kakọta-Ike eepfu. Ọ buru l'eka-a be mu a-nodu wobata ehuguu.” Nokwa iphe, Chipfu, bu Ọkalibe-Kakọta-Ike eepfu.

Ndu Ízurẹlu emerwushi onwophe

¹⁰ O rwua l'abalị k'ukporo l'eno l'onwa ke tete l'ime apha ono, kwe onye eze ono, bu Dariyosu ebo l'abu eze iya ono; Opfu Chipfu rwua onye mpfuchiru, bu Hagayi nchi su iya: ¹¹ “Wakwa iphe, Chipfu, bu Ọkalibe-Kakọta-Ike eepfu baa: Jieshikwa ndu-uke Chileke iphe, ekwo ekemu Chileke eepfu; su phe: ¹² Ọ -buru le nemadzu pyaru igburonu uwe iya apyapya bya egude iya paru anu, e doru nsọ; igburonu uwe iya ono rwua le buredi; ozoo l'o rwuru l'ophe, e teru etete; ozoo le mee; ozoo le manu; ozoo l'o rwuru

lẹ nri ọzo, dukporo iche; ?o meru g'iphe ono, o rwuru ono du nsọ ọtọ?"

Ndu uke sọ waawaa.

¹³ Noo ya; Hagayi sọ: "Onye merwuru onwiya opfu l'o denyiru odzu ẹka; ọ -ha-kwanuru iphe ono denyi ẹka; ?O merwuwaru iphe ono ọtọ?"

Ndu uke sọ iya: "Ee. O merwuwaru iya."

¹⁴ Hagayi byakwa bya eyee ọnu sọ: "Nokwa g'ọ du l'ẹhu ndu ọha-a, nọ mu l'iphu-a; waa l'ẹhu iphemiphe-a, ẹphe emekpoo ememe; mekpoo iphemiphe, ẹphe agwa agwagwa, bukota iphe, e merwuru emerwu. Nokwa iphe, Chipfu eepfu bu ono."

Chipfu e-kebe ndu Izurelu l'oma

¹⁵ "Sọ-a; unu lenaa ẹnya huma g'uzo unu gbaru; e -shi ntanụ jasuru. Unu lewarọ g'iphe shi du teke e teke ewotadu mkpuma kpopfube lẹ nwibe iya l'eze-ulo Chipfu. ¹⁶ Teke ono shi abujeru: onye -jeshiaru l'ẹka ọ kuberu ikpo nri ukporo; l'ọ buwaru iri kpoloko phoduru iya. Onye jeru l'ẹka aakuje mee je akuta iya mee, l'e-ji ugbobele-mee ukporo labọ l'iri; l'ọoburu ukporo lanu kpoloko be ọo-kuta iya. ¹⁷ Akanya, unu gude ẹka unu see be mu meru ọ chashihu manụ; tsushia evu; mu tųpyashia ya l'akamini; ọphu unu aghakwaru mu pho iphu. Ọ kwa Chipfu epfu. ¹⁸ Unu lenaa ẹnya g'uzo unu a-gba; a -gbẹ ntanụ-a, bu ukporo abali l'abali ẹno k'onwa tete-a jasuru. Mbụ-a; unu lenaa ẹnya g'uzo unu gbaru; e -shi mboku ono, a tųru okpa-ulo eze-ulo Chipfu ono. ¹⁹ ?O nwekwaduru mebyi-iphe, dukwadu l'oba? Mbụ lẹ-a; e -shi

teke ono jasụ nta-a bẹ vayinu; yẹle oshi figu; waa oshi itorokuma; mẹ oshi Olivu unu g'ọ ha ta adukwa ọphu eyeje mebyi. Ọle e -shi ntanu-a bẹ mu byaru ekebe unu l'oma.”

Zerúbabelu bụ echi, Chipfu gba l'ẹka

²⁰ Opfu Chipfu byakwa erwua Hagayi nchi ọzobakwa k'ugbo ẹbo lẹ g'onwa dụ l'ukporo abali l'abali ẹno ono. Ọ sụ iya: ²¹ “Pfuru Zerúbabelu, onye bụ iya bụ nnajioha lẹ Jiuda; lẹ mu abya anma igwe yee eliphe yigayiga. ²² Mu a-gha aba-eze ndu bụ eze igharaphu. Mu emebyishia ike ndu-ishi l'ohamoha. Mu a-gha ugbo-inya yee ndu agba iya nụ igharaphu; inya yee ndu agba iya nụ adaa ndatewo; onyenonu bụ nwibe iya e-gude ogu-echi iya gbua ya. ²³ O -rwua mboku ono; ọ kwa Chipfu, bụ Ọkalibe-Kakota-Ike eepfu; bẹ mu e-duta gube onye-osi mu, bụ Zerúbabelu nwa Sheyalutiyelu; ọ kwa Chipfu epfu. Mu e-me ngu g'i dụ g'echi-ohubama, mu agbajẹ l'ẹka; kele ọ kwa mbedua hotaru ngu.” Nokwa iphe, Chipfu, bụ Ọkalibe-Kakota-Ike l'epfu.

Bayiburu Izii
Izii: Bayiburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

c6885c7c-c550-5b8b-a4fe-4bd714af4f6d